

Rondeletius bezeugt daß diese Fisch auß dem Genffer See / vber zwö Ellenbogen lang gen Leon verkaufft werden / sonst wöllen etliche Authores, er werde nirgents gefangen / dann im Gardsee / da er Carpione genent wirdt / à carpando Aurum, daß er Gold fresse / welches wohl auff diese weis mag verstanden werden / daß sie den Schleckmäulern das Gold auß dem Seckel fressen / weiln dieselbigen / damit sie ihrem appetit gnuß thüent / solche vnnd dergleichen Schleckfisch zukauffen / sich kein Geld bedauern lassen. Dessen thut Neldung Amb. Cal. vnnd sagt Carpio à Benaci Lacus accolis appellatur Piscis vni huic Lacui peculiaris quem aureis arenulis vicitare credunt.

Von den ansiossenden Völkern des Gartsees / wirdt die Rothforenen / welche sonst in keinem andern / als diesem See soll gefunden werden ) Carpio genant / vermeinende daß sie von den Goldflügen leben.

Item Paul. Iou. de fassamentis lib. de Pisc. Rom. cap. 45. sagt / vnnd der den eingesalzenen Fischen haben ohne menigkliches widerreden / zu vnsern Zeiten die Carpiones (die Rothforenen) auß dem Gartsee / den Preys vnnd Vorthritt / wann sie zimlich gebachen / hernach bescheidenlich gesalzen werden / haben eben die gestalt / vnnd sindt eben des geschmacks / als die Forenen / dann ihr Fleisch eben auch rothlecht / vnd sindt ihre silberfarbe Rucken mit vnderschiedlichen Puncten besprenget zc. Es werden in ganz Italia sagt er Louius, in keinem als in dem Gartsee Rothforenen gefunden / derohalben glaube er / daß die alten so von Fischen geschriben / dieses Fisches nicht gedoncken / nicht daß er ein vnedler sonder vilmehr ihnen ein unbekanter Fisch gewesen / vnnd Frater Georgius Iodocus Berganus, Ein Mönch zu S. zeno zu Verona, in seiner reimens weis verfaßten beschreibung des Gardsees / sagt / der Caprio das ist der Rothforenen / lebt von dem Gold / findet sich in keinem andern als in dem Gradsee / vnnd dann einem See in Abruzzo bey Soralago di Posta genant.

Ich hab nit vnderlassen wöllen die Form / auß vnnd innerliche gestalt des Rothforenen selbst eigentlich zubesichtigen / des halben einen so auß dem vnserem See / den 31. Ianuarij 1643. außgeschöpfft / ganz frisch für mich genommen / vnnd also befunden / er hat ein zimlich langen Kopff vnnd groß Maul / zweyfache Luffelöcher vor den Augen / wie die Salmonen /